



KEMENTERIAN PERPADUAN NEGARA

SIARAN MEDIA

KPN SAMBUT BAIK CADANGAN BINA MEMORIAL TUN ABDULLAH AHMAD BADAWI

KEPALA BATAS, 16 September 2025 – Sebagai manifestasi penghargaan terhadap ketokohan, kepimpinan, sumbangan dan jasa Tun Abdullah, Kementerian Perpaduan Negara (KPN) menyambut baik cadangan dan usaha bagi membina Memorial Tun Abdullah Ahmad Badawi. Perkara tersebut dinyatakan oleh YB Datuk Aaron Ago Dagang, Menteri Perpaduan Negara semasa menyempurnakan **Program Mengenang Negarawan Tun Abdullah Ahmad Badawi: “Bapa Pembangunan Modal Insan”** hari ini.

Dalam ucapannya, YB Datuk Aaron Ago Dagang menzahirkan penghargaan dan ucapan **terima kasih kepada Kerajaan Negeri Pulau Pinang yang telah meluluskan tanah bagi tapak pembinaan memorial tersebut di Vision Park, Bertam, Kepala Batas, Pulau Pinang**. Kerajaan MADANI melalui KPN akan memberikan sokongan dan kerjasama penuh kepada Arkib Negara Malaysia bagi merealisasikan pembinaan memorial tersebut yang bakal menjadi simbol legasi Tun Abdullah untuk tatapan dan dikenang oleh generasi yang akan datang.

Nilai kemanusiaan adalah asas pembangunan dan kemakmuran negara. Kemerdekaan bukan sekadar pengisytiharan bebas daripada penjajah sebaliknya ia adalah tanggungjawab untuk membina sebuah negara bangsa yang kukuh, berakar pada nilai bersama serta berpaksikan keadilan dan kesejahteraan untuk semua rakyat seiring dengan pendekatan pembangunan modal insan yang diilhamkan oleh Tun Abdullah Ahmad Badawi, tambah beliau dalam ucapannya di sebuah hotel di Bertam, Kepala Batas, Pulau Pinang.

Pada masa yang sama, pelbagai bentuk sumbangan Tun Abdullah merentasi bidang politik, pentadbiran, pembangunan insan dan perpaduan negara telah memberi kesan mendalam kepada kesejahteraan rakyat. Antara sumbangan terbesar beliau termasuk penubuhan Institut Integriti Malaysia (IIM), Institut Kanser Negara (IKN), pemerkasaan Badan Pencegah Rasuah – kini dikenali sebagai SPRM, dan gagasan Islam Hadhari yang menekankan keseimbangan pembangunan fizikal dan modal insan.

Kementerian Perpaduan Negara

16 September 2025

KPN.100-9/1/16 (79)